

PENEMPATAN ORANG-ORANG ACHEH, DIYAN; KEDAH

PTAR

PENDAHULUAN

Mengkaji senibina tempatan adalah mustahak untuk mengenali konsep senibina itu .

Senibina itu wujud di atas pengaruh-pengaruh seperti alam-
sekitar, adat, kebudayaan dan kepercayaan.

Untuk memenuhi syarat untuk mendapat Diploma Senibina, ITM.
kami diwajibkan menyiapkan disertasi senibina.

Tajuk disertasi yang saya ini berjudul :

PENEMPATAN ORANG-ORANG ACHEH, DIYAN; KEDAH

Pemilihan tajuk ini adalah untuk mengkaji sejauh manakah
senibina itu mempengaruhi orang-orang Aceh disini

PENGHARGAAN

Bersama-sama saya ingin mengucapkan setinggi-tinggi penghargaan kepada kedua ibubapa saya, Encik Mohd Yusof bin Haji Hassan, Encik Rodzi dan kawan-kawan sekelas diploma senibina tahun 4 sesi 82/83, ITM Shah Alam, Selangor. Penghargaan yang tidak terhingga kepada pensyarah saya Encik Abdul Ghani Mohd Desa yang telah banyak berjasa dan berbudi kepada saya. Kalau tidak kerana beliau disertari ini tidak mungkin dapat ditulis dan diterima. Tidak ketinggalan penghargaan diberi kepada Cik Ismatee yang telah meminjamkan mesin taipnya dan Cik Zubaidah yang menaip disertari dengan bertungkus lumus untuk menyiapkannya.

Sekian, terima kasih.

Halmi Zakaria

LATAR BELAKANG SEJARAH

Dipekan Yan, Kedah, terdapat satu golongan orang Aceh yang tinggal dipekan itu sejak awal abad kedua puluh lagi. Mereka tinggal didalam sebuah kampung yang bernama Kampung Aceh (luasnya setengah batu persegi) yang terletak kira-kira 200 ela dipusat bandar itu. Jumlah orang Aceh yang ada dikampung itu pada hari ini lebih kurang 500 orang.

Kehadiran mereka disini adalah disebabkan kekalahan negeri Aceh ditangan Belanda. Peperangan Aceh-Belanda berlaku dengan hebatnya selama 35 tahun. Belanda hanya dapat menawan Aceh pada tahun 1908.

Oleh kerana tidak sanggup tinggal dibawah pemerintahan orang kafir (Belanda) maka segolongan, terutama sekali para ulama Aceh beserta dengan pengikutnya mengambil keputusan untuk meninggalkan Aceh dan merantau ke negeri orang.

Disebabkan negeri Aceh berhampiran dengan negeri Aceh, maka mereka pun terus menuju ke sebuah Gunung Jerai yang terletak berhampiran dengan pekan Yan yang menjadi tempat pedoman arah. Ada juga yang menuju ke Perak, Pulau Pinang dan Pulau Langkawi.

Pendaratan awal adalah diketahui di sebuah pengkalan sejauh setengah batu dari pekan Yan yang kemudiannya diberi nama Kampung Ruat. Setelah tinggal di Kampung Ruat selama 7 tahun mereka dapati tempat itu tidak sesuai. Lalu mereka berpindah ke Yan, iaitu tempat sekarang (Kampung Aceh). Pada masa itu Kampung Aceh dikenali dengan nama Lubuk Kasai. Walaupun tempat ini penuh dengan hutan rimba yang tebal, maka mereka suka tinggal di tempat ini kerana mereka senang mendapat bekalan air yang mengalir dari Gunung Jerai dan juga berdekatan dengan sawah padi.

Penghijrahan ini berlaku dari tahun 1900 hinggalah ke tahun 1915. Orang-orang Aceh yang berhijrah ke Yan dapat digolongkan kepada 3 kumpulan; pertama ialah ulama, kedua pemugar tanah dan ketiga peniaga. Kumpulan pertama mula-mula sampai ke Kedah pada tahun 1900 diketuai oleh Tengku Di Balai atau nama sebenarnya Tengku Arshad.

Beliau adalah ulamak Aceh yang terkenal. Beliau membawa keluarganya dan pengikutnya (iaitu murid-murid lelaki yang hendak belajar agama Islam dengan nya). Setelah membuka Kampung Aceh mereka mendirikan pondok-pondok sebagai tempat penginapan penuntut-penuntut lelaki yang masih bujang.

Apabila pembukaan ke Aceh diketahui dinegeri Aceh, ramai lagi saudara-mara mereka turut datang ke Yan. Ini termasuk kedatangan dua orang lagi ulamak Aceh yang terkenal iaitu Tengku Lam Surau (nama sebenarnya Haji Musa) dan Tengku Lam U (nama sebenarnya Sheikh Omar). Kedatangan mereka berdua ini adalah diikuti pula dengan kedatangan pengikut atau penuntut mereka berdua.

Kedatangan 3 orang ulamak ini dapat digolongkan kedalam peringkat penghijrahan orang Aceh kumpulan pertama dimana tujuan mereka yang mengikuti para ulama itu ialah untuk memperdalamkan pengetahuan Ugama Islam. Mereka yang datang itu tidak membawa keluarga sebab berniat hendak pulang ke Aceh semula selepas tamat pengajian agama Islam.

Kumpulan kedua orang Aceh yang datang ke Kampung Aceh terdiri daripada pemugar tanah. Mereka ini membawa modal yang berupa wang dan juga pekerja. Golongan ini membeli tanah kepunyaan orang Melayu disekeliling Kampung Aceh itu dan juga memohon tanah Kerajaan yang belum dipugar oleh sesiapaupun.